



कल कश्मीर युनिवर्सिटी च आयोजित इक अंतराष्ट्रीय नैनोट-टैक्नोलोजी सम्मेलन दे उदघाटन सत्र गी सम्बोधित करदे होई एल.जी. होरें आक्खेया जे इस चाल्ली दे सेंसर मिट्टी दी स्थिति दा पता लाने ते जिमी धस्सनें, लास पस्सियां पौने जनेई स्थिति पैदा होने कोला पैहले गै सौहगा सचेच करी सकन, तां एह मता फैयदेमंद साबत होई सकदा ऐ।

<><><><><><>

Dy. CM Visit

उपमुखमंत्रि सुरेन्द्र चौधरी होरें जम्मू ते राजौरी जिले च हाई करी प्रभावित इलाकें दा दौरा लाया ते भारी बरखें करी होए दे नुक्सान दा जायजा लैता। उनें राह-सलेयोत च परगवाल ते राजौरी दे सुन्दरबनी दा दौरा लाया। उप-मुखमंत्रि होरें राह-सलेयोत च कायम राहत शिविर दा दौरा लाया ते सरकार आस्सेया हर संभव सहायता दा भरोसा दोआया। उनें परगवाल Indripatan पुल दा बी नरीक्षण कीता ते इसी फौरी पूरा करने पर जोर पाया। अपने दौरें दौरान उप-मुखमंत्रि होरें प्रभावित परोआरें कन्नै गल्लबात कीती ते चला रदे राहत कम्में दा जायजा लैता। इसदे इलावा उप-मुखमंत्रि होरें राजौरी दे Kangri इलाके दा बी दौरा लाया ते लास-पस्सियां पौने करी मारे गेदे 2 लोकें दे परोआर आहले कन्नै मलाटी कीती ते अपनी हमदर्दी जाहिर कीती। उनें मुखमंत्रि राहत कोष थवां 4 लक्ख रुपें दी माली सहायता बी उनेंगी दिती। मीडिया कर्मियें कन्नै गल्ल करदे होई उपमुखमंत्रि होरें आक्खेया.....

<><><><><><>

IMCT- Team

जम्मू-कश्मीर च हाड़े ते बरखें कारण पैदा होए दे हालात दी जानकारी कठेरने लेई केन्द्र सरकार आसेया भेजी गेदी अंतर मंत्रालयी केन्द्री टीम नै कल बडगाम जिले दा दौरा कीता।

राष्ट्रीय -आपदा प्रबंधन निगम दे कारवाइयें सरबंधि सलाहकार ते संयुक्त सचिव कर्नल के.पी. सिंह हुंदी अगुआई च आई दी इस टीम जेहदे च ग्रामीण विकास, NDMA, जलशक्ति, बिजली ते होरनें मंत्रालयें सवा आए दे अधिकारी बी शामिल न, नै कल उत्थू दे जिला विकास कमीशनर डाक्टर बिलाल मोहि-उद-दीन भट्ट हुंदे कन्ने इक जायजा बैठक लाई। बैठका च प्रभावत इलाके दे बारे च चर्चा कीत गई, जिन्दे च बेमिना ते बी.के. पोरा वगेरा शामिल न। इस दौरान उत्थे होए दे नुकसान, जारी राहत ते बचाव कम्में ते प्रभावत इलाके च बा-आबादकारी लेई भविष्य दियें तयारियें दे बारे च चर्चा कीती गई। केन्द्री टीम नै हाड़े सवां प्रभावत इलाके च जाइयें लोके कन्ने गल्लबात कीती ते उनेंगी दरपेश दिक्कतें-परेशानियें बारे बी पुच्छेया। टीम लोके गी भरोसा देआया जे इस बारे तफसीली रिपोर्ट तौले गै केन्द्र सरकार कश जमा करोआई दिती जाहग तां जे लोड़चदी मदद लोके तोड़ी पुज्जी सके।

<><><><><><>

Pro. Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, औंदी 10 सितम्बर गी इक वशेष परिचर्चा प्रसारत करने जा रदा ऐ-जेहदा विषय सार ऐ- “निगगर आर्थिक सुधारें राएं विकास गी बढ़ावा।” इस कार्जक्रम च स्हाड़े महमान होगंन-मन्ने-परमन्ने दे अर्थशास्त्री ते जम्मू युनिवर्सिटी च इकोनॉमिक्स दे जम्मू प्रोफैसर दिपांकर सेनगुप्त- जेहड़े इस विषय दे बक्ख-बक्ख पैहलुएं पर लौ पागंन। उन्दे कन्ने गल्लबात करगंन जगमोहन शर्मा ते कुणाल श्रीवत्स। 30एं मिन्टे दा एह कार्यक्रम अतरु बुधवारे दिने साइडे 12 बजे प्रसारत कीता जाहग। जिसी तुस स्हाड़ी FM फ्रिक्वेंसी 100 इशारिया 3 मैगाहर्टस ते कन्ने मीडियम वेव 303 मीटर यानि 990 Khz पर बी सुनी सकदे ओ।

<><><><><><>

## Flash

कश्मीर जोन पुलस आसेया हुनै-हुनै जारी इक जानकारी मुजब कुलगाम जिले दे गुददर आहले जांगली इलाके च सुरक्षाबलें ते आंतकवादियें बश्कार टाकरा छिड़ी पेदा ऐ। शुरुआती जानकारी मुजब इक टकोहदी सूह दी बिनाह पर कारवाई करदे होई, जम्मू-कश्मीर पुलस दे SOG ग्रुप फौज ते CRPF नै इलाके गी घेरे दा ऐ। होर ब्योरे गी बलगेया जा रदा ऐ।

<><><><><><>

## Train Service

उत्तरी रेलवे नै श्री माता वैष्णो देवी कटरा थमां संगलदान बश्कार 5 दिने लेई खास यात्रु रेल सेवा शुरु करने दा फैसला कीता ऐ। एह सेवा अज्जै थवां शुरु होई। इस सेवा गी रियासी ते रामबन च फसे दे यात्रियें दी सुविधा लेई चलाया गया ऐ, जेड़े चानचक्क हाड़ औने करी फसी गेदे न। इक रेल गड्डी बड्डलै 8 बज्जियै 40 मिनटें पर कटरा थवां चलोग ते एह बड्डलै 10 बजे संगलदान पुज्जोग, जिसलै कि दपैहरी 2 बज्जियै 15 मिनटें पर एह रेल वापस परतोई औग। एह गड्डी रियासी, बक्कल, Dugga ते Sawalakot थाहर किश चिर लेई रुकोग। उयां जम्मू-कटरा आहली रेल सवा बाधित रहोग। रस्ते गी ठीक करियै सेवा गी ब्हाल करने लेई जत्न जारी न।

<><><><><><>

## Highway (Byte)

जम्मू-श्रीनगर राष्ट्रीय जरनैली सिड़क गड्डियें दी आवा-जाई लेई अजे बी बंद ऐ, एह सिड़क जखैनी ते Bali Nallah बश्कार सिड़क बंद होने करी आवा-जाई लेई बंद ऐ। इस करी गड्डियें दी आमदोरफ्त पूरी चाली बंद ऐ, जेदे करी जरुरी चीजें-बस्तें ते आपातकालीन सेवाएं दी सप्लाई पर जिला उधमपुर, किशतवाड़, डोडा, रामबन ते कश्मीर च असर पेया ऐ। भारतीय जनता पार्टी ते विधानसभा च विपक्ष दे नेता सुनील शर्मा होरें कल थरड दा दौरा कीता ते उत्थे चला रदे कम्मे दा जायजा लैता। इस मौके पर आकाशवाणी समाचार कन्नै गल्ल करदे होई उनें आक्खेया.....

ट्रैफिक मैहकमे आसेया जारी हिदायतें मूजब जम्मू दे नगरोटा थवां चनैनी, पत्नीटॉप, डोडा, रामबन, बनिहाल, श्रीनगर जाने आहली गइडियें गी अगगें जाने दी इजाजत नैई होग। कटरा, रियासी ते उधमपुर आहले बसनीकें गी आक्खेया गया जे ओह फोटू लगगे दे अपने ID कार्ड अपने कन्नै रक्खन तां जे उन्दी आवा-जाई होई सके।

<><><><><><>

#### Asia Cup Hockey

भारत नै मर्दे दी एशिया कप हॉकी प्रतियोगिता जिती लैती ऐ। बिहार दे राजगीर च खेड्डे गेदे खीरी मुकाबले च भारत नै दक्खन कोरिया गी 4-1 कन्नै हराया। इसदे कन्नै गे भारत नै नीदरलैंड ते बेल्जिम च अगले बरे होने आहले विश्व कप आस्तै बी क्वालीफाई करी लैता ऐ। मैच मगरा मीडिया कन्नै गल्ल करदे होई भारतीय टीम दे मुख्ब कोच होरें आक्खेया जे एह प्रेरणादायक जित्त ऐ। भारत नै इस प्रतियोगिता च सारे मैच जिते। कप्तान हरमनप्रीत सिंह होरें आक्खेया जे एह खिताबी जीत मैच दर मैच प्रदर्शन च सुधार दा नतीजा ऐ।

<><><><><><>

#### PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ।

दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>

JKSET –LASET

केन्द्र शासत प्रदेश जम्मू-कश्मीर ते लद्दाख च अस्सिस्टेंट प्रोफैसरें लेई JKSET ते LASET आहला मतेहान कामयाबी ते बवस्था आहले ढंगै सिर करोआई लैता गया जेहदा जे उच्च शिक्षा च जांच प्रक्रिया च महत्वपूर्ण मील दा पत्थर ऐ। दौनें केन्द्र शासत प्रदेशें लेई लैते गेदे इस मतेहान लेई सब्भनें केन्द्रें च लोडचदे सब्भें बंदोबस्त कीते गेदे हे। बक्ख-बक्ख कालजें ते युनिवर्सिटी च अस्सिस्टेंट प्रोफैसर दे ओहदे लेई योग्यता तैह करने आहले इस मतेहान च पूरी बवस्था-पारदर्शिता ते कुशलता बनाई रक्खी गई जेहदी सब्भनें सिफ्त कीती। अधिकारियें इस मतेहान गी कामयाबी कन्नें करोआने लेई सरबंधित सब्भनें धडे दी कुशलता ते आपसी तालमेल दी बी सराहना कीती।

<><><><><><>